

# Recurs cunter il modus d'eleger il cussegl grond

La dretgira administrativa n'entra betg en il recurs cunter il modus d'eleger il cussegl grond

■ (cp) Ils recurrents han mess en dumonda fundamentalmain la constituizionalitad da la procedura electorala da maior vertenta per il cussegl grond. La dretgira administrativa ha decis ussa ch'il recurs è entrà cun retard. A medem temp ha la dretgira negà sia cumpetenza d'examinar las disposiziuns da la Constituziun chantunala.

Il di s'enter las elecziuns dal cussegl grond dals 18 da matg 2014 han ils recurrents proponì d'annullar il resultat da las elecziuns. Cun il recurs n'han las var 30 personas privatas betg gi primarmain l'intenziun da pretendir ina repetiziun da las elecziuns, mabain dad eliminar las mancanzas fatgas valair en la procedura electorala en vista a las proximas elecziuns l'onn 2018. Il crap da stgarpitsch èn las vuschs che vegnan validadas inegualmain: il circol d'Avras cun 159 personas per exempel, il pli pitschen circol electoral cun in deputà, ha il dretg d'in mandat en il cussegl grond exact tutina sco il circol da Churwalden che dumbrava 1922 personas. Tenor l'opiniun dals recurrents vegnia la quota da vuschs da las singulas electuras e dals singuls electurs uschia sfalsifitgada a moda inadmissibla. Ils organs politics cumpetents duajan perquai vegnir obligads da crear in urden electoral conform a la constituziun

**Nagin scleriment tematic en la sentenza giudiziala**

A la dumonda, schebain il sistem electoral vertent è conform a la constituziun u

betg, n'ha la dretgira betg respundì, perquai ch'ella n'è gnanc entrada en il recurs sin fundament dal retard. Il retard è d'attribuir al fatg che la regenza aveva fixà gia

il settember 2013 en vista a las elecziuns da renovaziun totala dal cussegl grond dal chantun Grischun per la perioda d'uffizi 2014–2018 per mintga circol il

dumber dals deputads ch'èn d'eleger. Quest conclus è vegnì publitgà en il Fegl uffizial dal chantun Grischun ed è silsuerter restà incontestà. La dretgira administrativa vegn a la conclusiun ch'ins na po betg spetgar il resultat d'ina elecziun e pir s'enter contestar, tut tenor il resultat da quella, in modus electoral determinà gia bler pli baud. Concretamain vul quai dir ch'ils recurrents avessan tenor l'opiniun dals derschaders stuì preschentar lur intent gia l'atun 2013. Ultra da quai ha la dretgira laschà percorscher ch'ella na fiss era betg entrada en il recurs sche quel fiss entrà a temp. A la dretgira administrativa sco dretgira constituizionala po bain vegnir appellà, ma la cumpetenza d'examinaziun da la dretgira sa limitescha a la dumonda sche las disposiziuns da las leschas ed ordinaziuns chantunales stattan en accord cun la Constituziun chantunala. Sin fundament da la separaziun da las pussanzas na po la dretgira administrativa dentant betg examinar schebain la Constituziun chantunala sezza è legala. Als recurrents n'èn vegnids adossads nagins custs. Cunter la sentenza po vegnir recurrì tar il tribunal federal.



La dretgira administrativa n'è betg entrada sin il recurs cunter il modus d'elecziuns dal cussegl grond.

FOTO O. ITEM

Sentenza V 14 10 dals 17 da december 2015